

MOKANDA YA LIBOSO YA YOANE 1

[Mokapo 1](#) — [Mokapo 2](#) — [Mokapo 3](#) — [Mokapo 4](#) — [Mokapo 5](#)

1 MOKAPO 1

1. Oyo azalaki wuta ebandeli, oyo biso toyokaki, oyo biso tomonaki na misu na biso, oyo biso totalaki malamumu mpe maboko na biso esimbaki. 2. Na oyo etali liloba na bomoyi (bomoyi esilaki komimonisa ; mpe biso tomonaki, mpe biso tozotatola, mpe biso toteyi bino bomoyi ya seko, oyo azalaki epayi ya Tata mpe amimonisamaki na biso. 3. Oyo biso tomonanaki mpe toyokaki, biso tozoteya bino, na ntina ete bino mpe bozala na **lisanga** na biso : Nzokande liyangani na biso eza elongo na Tata mpe elongo na Mwana na ye Yesu Kristu. 4. Mpe biso tozokomela bino makambo, na ntina ete esengo na bino ezala ya kokoka. 5. Mpe ezali awa sango biso toyokaki na ye, mpe biso toteyi bino, ete Nzambe azali polé mpe kati na ye ata milili moko eza te. 6. Soki biso tozoloba ete biso toza na **liyangani** elongo na ye, mpe ete biso tozotambola kati na milili, biso tozokosa mpe biso tozosalela solo te, 7. Na yango soki biso tozotambola kati na polé, lokola ye moko azali kati na polé, tozali na liyangani bamoko elongo na basusu, mpe makila na Yesu Kristu Mwana na ye ekopetola biso, na masumu nionso. 8. Soki tozoloba ete biso toza na lisumu te, tozali biso moko komipenguisa, mpe solo eza te kati na biso. 9. Soki biso tokotubela masumu na biso, ye azali sembo mpe moyengebeni pona kolimbisa masumu na biso mpe kopetola biso na mbindo nionso. 10. Soki biso tolobi ete biso tosumuka te, biso tozosala ye mutu na lokuta mpe liloba na ye eza te kati na biso.

2 MOKAPO 2

1. Bana na ngai, nakomeli bino makambo oyo mpo bino bosumuka te ; mpe soki moko asumuki, biso toza na **molobeli** biso epayi na Tata, Yesu Kristu, moyengebeni ; 2. Mpe ye azali mbeka ya masumu na biso, mpe eza kaka pona biso moko te, kasi pona mokili mobimba. 3. Boye nde biso toyebi ete biso toyeba ye soki biso tozobomba mibeko na ye. 4. Oyo aloba : nayebi ye, mpe azobomba te mibeko na ye, azali lokuta, mpe solo eza kati na ye te. 5. Kasi oyo nionso azobomba liloba na ye, kati na ye bolingo na Nzambe ezali solo ya kokokisama : bongo toyebi ete tozali kati na ye. 6. Oyo alobi azali kowumela kati na ye esengeli ye moko atambola ndenge ye atambolaki. 7. Balingami, nakomeli bino te mobeko moko ya sika, kasi mobeko moko ya kala, oyo bino bozuaki wuta ebandeli. Mobeko ya kala eza liloba oyo bino boyokaki. 8. Mbala moko lisusu, nakomeli bino mobeko moko ya sika, oyo ezali solo kati na ye mpe kati na bino, pamba te milili ezokende mpe polé ya solo ezo ngenga. 9. Oyo azoloba aza na polé mpe azoyina ndeko na ye, aza na milili ti sik'oyo. 10. Oyo azolinga ndeko na ye, azali kati na polé,

mpe epayi na ye ndenge ya kokweyisa eza.te. 11. Bongo oyo azali koyina ndeko na ye azali kati na milili, mpe ayebi te esika azokende, pamba te milili ebomi ye misu na ye.

12. Nakomeli bino, bana, pamba te masumu na bino elimbisami na kombo na ye.

13. Nakomeli bino, batata, pamba te bino boyebi oyo azalaki wuta ebandeli.

Nakomeli bino, bilenge, pamba te bino bozali balongi mpe bolonga mutu mabe.

Nakomeli bino, bana mike, pamba te bino boyebi Tata.

14. Nakomelaki bino, batata, pamba te bino boyebi oyo azalaki wuta na ebandeli.

Nakomelaki bino, bilenge, pamba te bino bozali makasi, mpe liloba ya Nzambe evanda kati na bino, mpe bino bozali balongi mpe bolonga mutu mabe. 15. Bolinga mokili te, mpe biloko oyo ezali na mokili te : soki mutu alingi mokili, bolingo na Tata ezali kati na ye te, 16. Pamba te oyo nionso ezali kati na mokili, kolula ya nzoto, kolula ya misu, lolendo ya bomoyi, ezali ya Tata te, kasi ezali ya mokili, 17. Mpe mokili ezali kokende mpe kolula na yango, kasi oyo akosala na mokano ya Nzambe awumeli seko,

18. Bana mike, ezali ngonga ya suka ; mpe ndenge bino boyokaki ete antikristu akoya, sikoyo bongo ba antikristu bazali ebele, na yango biso tozoyeba ete ezali ngonga ya suka ; 19. Babimaki kati na biso, kasi bazalaki ya biso te ; pamba te soki bazalaki ya biso, balingaki kovanda elongo na biso. Kasi bamonani ete ata moko te kati na bango azalaki na biso. 20. Mpe bino, bino bozua epakolami epayi na Mosantu mpe bino boyebi makambu nionso. 21. Nakomelaki bino te, pamba te bino boyebi solo te, kasi mpo boyebi yango mpe ata lokuta moko te ewutaka na solo. 22. Nani azali moto na lokuta, ezali kaka oyo azoboya ete Yesu azali Kristu? Oyo wana nde azali antikristu, awangani Tata mpe Mwana. 23. Oyo nionso akoboya Mwana aza mpe na Tata te; oyo aza kotatola Mwana, azali mpe na Tata. 24. Pona bino, oyo bino boyokaki wuta ebandeli evanda kati na bino : Soki oyo boyokaki wuta ebandeli evandi kati na bino, bino mpe bofandi kati na Mwana mpe kati na Tata. 25 Mpe ezali awa elaka ye apesaki na biso, bomoyi ya seko. 26. Nakomelaki bino makambu oyo, etali batu oyo bazali kopengwisa bino. 27. Mpe pona bino, epakolami bozwaki na ye evanda kati na bino, mpe bino boza na posa te moto atangisa bino ; kasi lokola epakolami etangisa bino na ntina ya makambu nionso, mpe yango ezali solo mpe eza lokuta te, mpe na ndenge etangisaki bino, bino bovanda kati na ye.

28. Mpe sik'oyo, bana, bovanda kati na ye, ete tango akomonisama, biso tokozala na elyikia mpe biso tokozala te na kolatisama soni, na nzela na ye, naboyeyi na ye,

3 MOKAPO 3

2-29. Soki boyebi ete azali sembo, boyeba ete moto nionso azosalela bosembo abotama na ye.

1. Botala na bolingo nini Tata apesa biso likabo, mpo tobengama bana na Nzambe; na yango mokili eyebi biso te, pamba te eyebaki ye te. 2. Balingami, tozali sik'oyo bana na Nzambe, mpe oyo tokozala nanu emonani te; biso toyebi ete tango yango akomonana biso tokozala ndenge moko na ye, pamba te biso tokomona ye ndenge azali...3. Mpe oyo nionso azali na elikya kati na ye amipetolaka, lokola ye aza peto.

4. Oyo nionso asalaka lisumu, asalaka lisusu mbindo, mpo lisumu ezali mbindo.5. Bino boyebi ete ye amimonisaki, na ntina kolongola masumu na biso; mpe lisumu eza te kati na ye. 6. Oyo nionso avandi kati na ye asumukaka te; oyo nionso asumukaka amona ye te, ayebi ye mpe te.

7. Bana, moto abungisa bino te; oyo azosala bosembo aza sembo, ndenge ye azali sembo. 8. Oyo azosala lisumu aza ya diabololo, pamba te wuta ebandeli diabololo asumukaki. Na yango Mwana ya Nzambe amonanaki, na ntina ya kobebisa misala ya diabololo.

9. Oyo nionso abotama na Nzambe asalaka lisumu te, pamba te molona ya Nzambe evandi kati na ye, mpe akoki te kosumuka, pamba te abotama na Nzambe. 10. Na bongo emonani bana na Nzambe mpe bana ya diabololo: oyo nionso azosala bosembo te, aza ya Nzambe te. Mpe oyo alingaka ndeko na ye te. 11. Pamba te awa nde sango oyo bayakaki wuta ebandeli, tolingana biso na biso. 12. Eza te ndenge kaŋa oyo azalaki ya mutu mabe, mpe abomaki ndeko na ye. mpo na ntina nini aboma ye? Mpo misala na ye ezalaki malamumu te mpe oyo ya ndeko na ye ezalaki sembo.

13. Bokamwa te, bandeko soki mokili eyini bino, 14. Bisu, bisu toyebi ete toleka na kufa na epayi na bomoyi, pamba te bisu tozolinga bandeko; oyo alingi ndeko na ye te aza kati na kufa. 15. Oyo nionso **ayinaka** ndeko na ye aza mobomi, mpe boyebi ete, mobomi moko te aza na bomoyi ya seko kati na ye.

16. Na awa nde bisu toyebi bolingo, ete ye atikaki bomoyi na ye pona bisu; mpe bisu esengeli totika bomoyi na bisu pona bandeko. 17. Na bongo oyo azali na bozui ya mokili oyo, mpe atali ndeko na ye na bosenga mpe akangeli ye motema, ndenge nini bolingo na Nzambe ekoki kozala kati na ye?

18. Bana, bolinga na maloba to na monoko te, kasi na misala mpe na solo. 19. Mpe na yango tokoyeba ete tozali ya solo, mpe mitema na bisu ekozala na kimia liboso na ye. 20. Ete soki mitema na bisu eza na kokatela bisu etumbu, Nzambe azali monene koleka mitema na bisu mpe ayebi biloko nionso. 21. Balingami, soki mitema na bino ezokatela bino etumbu te, bisu toza na elikya epayi na Nzambe; 22. Mpe nionso oyo bisu tokosenga, bisu tozui yango na ye, pamba te bisu tozali kobomba mibeko na ye mpe tozosala makambu oyo eza malamumu liboso na ye. 23. Mpe awa nde ezali mobeko na ye, ete bisu tozondimela na nkombo ya Mwana na ye Yesu Kristu mpe ete bisu tolingani bisu na bisu, na ndenge apesa bisu mobeko; 24. Mpe oyo azobomba mibeko avandi kati na ye, mpe ye kati na moto yango; mpe na bongo bisu toyebi aza kati na bisu, koyeba Molimo oyo apesa bisu

4 MOKAPO 4

1. Balingami, bondimela milimo nionso te, kasi **bososola** milimo, soki bazali ya Nzambe, pamba te ebele ya ba profete ya lokuta babimi na mokili. 2. Na bongo bakoyeba molimo na Nzambe: milimo nionso oyo ezali kotatola Yesu Kristu ayaki na nzoto ezali ya Nzambe, 3. Mpe elimo nionso oyo eza kotatola te Yesu Kristu ayaki na nzoto, ezali ya Nzambe te; mpe wana ezali ya antikristu; na yango bino boyokaki koloba azali koya, mpe azali sik'oyo azali na mokili. 4. Mpona bino, bana, bozali ya Nzambe, mpe bino bozali balongi mpe bolongaki bango, pamba te oyo azali kati na bino azali monene koleka oyo azali na mokili. 5. Pona bango, bazali na mokili; bongo bazakoloba na ba ndenge ya mokili, mpe mokili ezali koyaka bango. 6. Bisu, bisu tozali ya Nzambe; oyo ayebi Nzambe akoyoka bisu; oyo aza ya Nzambe te akoyoka bisu te. Na yango bisu toyebi molimo ya solo mpe molimo na kobunga.

7. Balingami, tolinga moko mosusu, pamba te bolingo eza ya Nzambe, mpe oyo nionso alingaka abotama na Nzambe mpe ayebi Nzambe. 8. Oyo aza kolinga te ayebi Nzambe te, pamba te Nzambe aza bolingo. 9. Na yango esilaki komonana bolingo na Nzambe pona bisu,

eza ete Nzambe atindaki Mwana na ye moko na mokili na ntina ete biso tozala na bomoyi na nzela na ye. 10. Na bongo eza bolingo, eza te na biso, biso tolingaki Nzambe, kasi eza na ye alingaki biso mpe atindaki Mwana na ye mbeka pona kolongola masumu na biso .

11. Balingami, soki Nzambe alinga biso bongo, biso mpe esengeli biso tolingana moko na mosusu. 12. Moto te amona Nzambe, soki biso tolingani moko na mosusu, Nzambe afandi kati na biso mpe bolingo na ye ekokisami kati na biso. 13. Na yango biso toyebi ete tozali kati na ye mpe ye kati na biso, mpo apesa biso Molimo na ye ; 14. Mpe biso tomoni mpe totatoli ete Tata atinda Mwana mpo azala Mobikisi ya mokili.

15. Oyo nionso akotatola Yesu aza Mwana na Nzambe, Nzambe aza kati na ye mpe ye kati na Nzambe. 16. Mpe biso toyebi mpe tondimi bolingo na Nzambe pona biso. Nzambe aza bolingo, mpe oyo aza kati na bolingo aza kati na Nzambe mpe Nzambe kati na ye. 17. Na yango kokokisama ya bolingo elongo na biso, na ntina ete tozali na molende nionso mokolo ya kosambisama na ndenge azali, ye, biso tozali, biso mpe na mokili oyo. 18. Kobanga ezali te kati na bolingo, bongo bolingo ekoka ebenganaka kobanga, pamba te kobanga ememaka elongo na ye etumbu, mpe oyo azali na kobanga aza ya kokoka te na bolingo. 19. Bisu, biso tozalingana pamba te ye alingaka biso liboso

20. Soki moto moko alobi: nalingaka Nzambe mpe azoyina ndeko na ye, aza lokuta pamba te oyo alingaka ndeko na ye te azomona, ndenge nini akolinga Nzambe oyo azo mona te? 21. Mpe biso toza na mobeko na ye oyo, oyo alingaka Nzambe, alinga mpe ndeko na ye.

5 MOKAPO 5

1. Moto oyo andimi Yesu aza Kristu, abotami na Nzambe; mpe moto oyo alingaki moboti, akolinga lisusu baye babotami na ye. 2. Na bongo biso toyebi ete tolingi bana na Nzambe, tango biso tolingi Nzambe mpê biso tobombi mibeko na ye. 3. Awa nde bolingo na Nzambe, tobomba mibeko na ye, mpe mibeko na ye ezali pasi te, 4. Pamba te oyo nionso oyo ebotami na Nzambe eza molongi na mokili ; mpe awa nde elonga oyo elongi mokili, eza kondima na biso. 5. Nani oyo aza molongi na mokili, bobele oyo andimi Yesu aza mwana na Nzambe.

6. Ye oyo ayaki na mayi, mpe na makila, Yesu Kristu, kaka te na kati ya mayi, bongo na kati ya mayi mpe ya makila ; mpe Molimo nde ezotatola, pamba te Molimo aza solo 7 ; pamba te ezali misato oyo eza kotatola ; 8. Molimo, mayi, mpe makila mpe misato eza nakoyokana pona litatoli moko. 9. Soki biso tozo yamba litatoli ya batu, kotatola ya Nzambe eza monene koleka ; pamba te yango oyo litatoli Nzambe apesaki na ntina ya Mwana na ye. 10. Oyo andimi Mwana na Nzambe, aza na litatoli kati na ye moko ; oyo azo ndima te Nzambe asali ye lokuta, pamba te andimi te litatoli Nzambe apesaki na ntina ya Mwana na ye. 11. Mpe eza awa litatoli : Nzambe apesa biso bomoyi ya seko, mpe bomoyi yango eza kati ya Mwana na ye : 12. Oyo azali na Mwana, azali na bomoyi, oyo aza na Mwana na Nzambe te aza na bomoyi te.

13. Nakomelaki bino makambu oyo na ntina bino boyeba ete bozali na bomoyi ya seko, bino oyo bondimi na kombo ya Mwana na Nzambe.

14. Mpe awa nde elikya biso toza na yango kati na ye, soki biso tokosenga eloko nionso ndenge ya mokano na ye, akoyoka biso ; 15. Soki biso toyebi akoyoka biso, ata ndenge nini biso tokosenga, biso toyebi ete tozali na biloko oyo biso tosengi ye.

16. Soki moto moko amoni ndeko na ye na lisumu, lisumu moko oyo eza ya kufa te,

asenga na ntina na ye. Mpe akopesa ye bomoyi, na baoyo basali masumu ya kufa te, eza na lisumu moko oyo eza ya kufa, : mpona na lisumu wana, na lobi te bosenga. 17. Mbindo nionso eza lisumu mpe eza na lisumu oyo eza ya kufa te. 18. Biso toyebi ete moto oyo abotami na Nzambe asumukaka te, na bongo oyo abotami na Nzambe amibombaka ye moko, mpe mutu ya mabe akosimba ye te. 19. Biso toyebi ete tozali ya Nzambe, mpe mokili mobimba ezobika na nguya na mutu mabe. 20. Nzokande biso toyebi ete Mwana na Nzambe ayaki, mpe apesi biso mayele mpo biso toyeba Solo, mpe biso tozali kati na Solo, koyeba kati na Mwana na ye Yesu Kristu : ye azali. Nzambe solo mpe bomoyi seko.

21. Bana, bomibomba bino mosika na bikeko.